

«In uman apolitic na davent jau però betg»

Vincent Augustin chala sco deputà al cussegl grond

DA FLURIN ANDRY / ANR

■ **Suenter 27 onns e prest 150 sessiuns èsi per il deputà Vincent Augustin oz l'ultim di al cussegl grond. El dat in sguard retrospectiv sin sia carriera en il parlament grischun.** Gi interess per la politica ha *Vincent Augustin* (pcd, Cuira) sco ch'el di quasi adina: «Gia sco figl d'in bab che fascheva da pur a Mon e ch'era deputà al cussegl grond e suenter era sco student a Friburg.» Senza avair grondas experientschas en la politica communal ha candidà Augustin l'onn 1987 per il cussegl grond e vegnì elegi. L'emprim ha'l represchentà il circuit Alvaschagn e dapi l'onn 2000 il circuit Cuira. Ses emprim affar politic pli grond aveva da far cun la chatscha, per el sco na-chatschader ina tscherta sfida.

«Success che fan anc adina plaschair»

Vincent Augustin era il president da la cumissiuin predeliberanta per la revisiun totala da la lescha da chatscha. «Dals 13 commembers da la cumissiuin eran franc indesch, sche betg dudesch chatschaders e las discussiuns eran per part fitg emozionalas, ma a la fin èsi gartegià dad evader era quella revisiun.» In highlight da sia carriera è stada a l'entschatta dals onns 90 sia moziun per reveder l'urden dal cussegl grond cun la finamira dad introducir cumissiuins fixas: «Fin quella giada avevan nus mo cumissiuins predeliberantas ad hoc, dapi l'entschatta dal 2000 datti uss era cumissiuins fixas, las qualas s'han verifitgadas», sa regorda'l, «uschia pon ils deputads s'infurmar ordavant e preparar la chaussa, uschiglio n'han han els nagina schanza cunter la regenza ch'è oz cun l'entira administraziun davostiers omnipotent.»



Vincent Augustin è stà 27 onns commember dal cussegl grond.

FOTO F. ANDRY

«Anc adina persvas da l'idea cun il rg»

L'onn 2003 ha sorprendi Augustin il presidi da la Lia Rumantscha. Durant ses temp d'uffizi è naschida l'opposiziun cunter il rumantsch grischun (rg) en scola: «Jau crai anc adina che l'idea d'alfabetisar en rg saja ina bun'idea, deplorablmain han ins manegià che cun instradar pass per pass dettia in svilup che mainia a quel punct», di el, ins haja però vis pli tard ch'ins avess stuì francar tschertas chaussas en la lescha e betg mo en in'ordinaziun da

la regenza u en in concept che la regenza haja fatg sin incumbensa da la gruppa rumantscha al cussegl grond. «Cun il concept da convivenza èsi gartegià tant enavant da manar la pasch tranter ils aderents ed ils adversaris dal rg sco lingua d'alfabetisaziun», constatescha el, «l'unica renfatscha che jau fetsch è ch'ils aderents dals idioms avessan stuì esser pronts d'acceptar tschertas decisiuns ch'èn vegnidas tratgas en cuminanza, ils process actuals fin als tribunals europeics na portan tenor mes manegiar betg grond fritg.»

«Diversas sfidas per il chantun en il futur»

La lavur en il parlament na s'ha midada, sco che Vincent Augustin di, uschè ferm durant ils ultims 27 onns: «L'administraziun dentant è creschida tant sin champ chantunal sco era communal, las fusiuns da las vischnancas èn segirmain positivas. La professiunalisaziun quattras ha però era consequenzas.» I vegnia pli char e la distanza tranter il singul citadin e las autoritads creschia, tema'l. Grondas sfidas per il Grischun

ils proxims onns èn a l'avis da Vincent Augustin surtut il svilup da l'agricultura, il turissem e l'economia d'energia: «L'agricultura alpina ha a mes avis sin la fiera mo schanzas cun products da nischa, sco p. ex. il chaschiel da muntogna e cun products cun il label bio.» La situaziun dal turissem è daventada, sco ch'el di, causa la gronda concorrenza naziunala ed internaziunala, fitg difficila: «Surtut il turissem d'enviern patescha, perquai èsi da chattar vias per intensivar il turissem da stad e d'atun.» Era l'economia d'energia patescha: «Sche la Germania subvenziunescha la producziun d'energia regenerabla influenzescha quai er ils pretschs da l'energia idraulica en Grischun, e cunquai era l'autezza dals tschains d'aua per vischnancas e chantun.»

Vincent Augustin na tema uss betg il temp senza il cussegl grond: «Jau na davent segirmain betg in uman apolitic, ma jau na crai era betg che jau haja suenter l'impressiun da stuair ma maschadar en en tut las discussiuns politicas», di el riend, «jau sper che jau saja bun da resister a tut las tentaziuns.»

Curt e bun

Prenum: Vincent
Num: Augustin
Domicil: Mon
Data da naschienscha: 29 favrer 1956
Insaina: Pesch
Professiun: Advocat
Hobi: Ballape
Tratga preferida: Bizochels gross cun ivettas
Bavronda preferida: In bun gut vin